

※書目文獻※

惜陰堂彙刻明詞跋（附校跋）（下）

趙尊嶽等撰 吳 格\*整理

171 石田詩餘一卷 長洲沈周啓南撰

沈周，恆吉子，字啓南，號石田，又號白石翁。博覽羣書，文學《左氏》，詩擬白、蘇，字仿山谷，尤工於畫。與唐寅、文徵明、仇英並稱爲「明四大家」。爲人耿介獨立，年十一，游南都，作百韻詩上巡撫侍郎崔恭。比長，郡守欲以賢良薦，筮《易》得〈遯〉之九五，遂絕意隱遁。風神蕭散，如神仙中人。正德間卒，年八十有三，世稱「石田先生」。著《客座新聞》、《石田集》、《江南春詞》、《石田詩鈔》、《石田雜記》，此則出自集中。《江南春》和倪作以已別行，不更附此。戊辰六月，高梧軒書。

172 名山藏詞一卷 丹陽葛筠東之撰

葛筠，字東之，明季人。康熙乙卯舉於鄉，選長洲外翰。長於文學，與魏叔子、侯朝宗交厚，爲序其文集。遺著《名山藏》二十八卷，道光二十七年元孫華爲梓行之。余就金陵書藏檢得其詞，爲附於明季諸家之後云。甲戌四月既望，珍重閣書。

173 葵軒詞一卷 貴谿夏暘汝霖撰

右《葵軒詞》一卷，明夏暘撰。暘字汝霖，江西貴谿人，爲夏鼎從兄。鼎則言父。按之汝霖於公謹，爲伯叔行也。曾任府司獄，其事蹟之可考者如此。甲戌仲春，海寧趙斐雲宗兄得傳鈔本，蓋猶明刻所孳乳，以之惠寄，廣吾所藏，稱快何似，亟以授梓，爲廣其傳。斐雲兼治南北曲，堅屬勿爲刪乙，故併存之。是歲天中

\* 吳 格，上海復旦大學圖書館古籍部主任。

節，高梧軒書。

#### 174 嘯餘譜二十五卷 歙縣程明善若水編

《嘯餘譜》，程明善撰。《四庫存目》著錄之。明善字若水，歙縣人，天啓間監生。其書載詞曲之格式，以歌之源出於嘯，故以「嘯餘」名譜。凡十卷。首列〈嘯旨〉，又〈律度〉、〈樂府〉，原題爲一卷。次〈詩餘譜〉，凡三卷，析之爲二十五卷，附宋致語。次〈北曲譜〉一卷，〈中原音韻〉及〈務頭〉一卷；次〈南曲譜〉三卷，〈中州音韻〉及〈切韻〉一卷。傳世者有萬曆元刊本及康熙間張漢重校本，余得藏其書。細檢詞譜，以天文地理、珍寶花木析類，已爲謬妄，又分二字題、三字題，則更涉怪誕。就中譜字之訛，不可勝數；平仄通假，一本己意，初不足語於詞律也。惟後附宋人致語，猶是大曲放隊之遺，爲後世所罕見。詞在天水一朝，家絃戶誦，至元曲興而詞法墜。明善強爲之譜，自謂解人，殊不足數。迨有清一代，萬氏出而訂譜，戈氏出而辨韻，斯道爲之大尊，返觀斯篇，不禁失笑。惟是明人初譜，流傳不多，大輅椎輪，亦足研討，因汰其致語，重爲梓行。至蘭荃佳什，倚聲名家，固不必引此相訂證也。《存目》斥之，誠哉其不足爲善本矣。乙亥鐙節，趙尊嶽跋。

丙子重易後五日，鐙下依康熙刻本校。崑。

#### 175 明詞綜十二卷 青浦王昶蘭泉纂

蘭泉司寇承金風亭長之後，輯《明詞綜》十二卷，蓋以亭長舊稿合諸平生所搜輯者，彙而梓之。所輯多出於《蘭皋館詞選》及《草堂新集》，茲二書傳本極尠，故世之言明詞者多宗司寇。余往年並得二者，且陸續付錄，於是明詞選本漸爲治金荃者所共賞，不必取資於此。司寇存佚媚古之功，固不可沒也。又選中諸家，余得其單行裁篇之本者，幾於什之五六，均登梨棗；假以歲月，或可更致如干種。茲編能爲之嚆引，用供參訂，所以益余者實多，因爲重雕，並紀歲月。（己）〔乙〕亥重五日，珍重閣。

丙子十二月廿六日據元槧本校。珍重閣。

#### 176 誠意伯詞一卷 青田劉基伯溫撰

誠意伯劉文成公，開國功勳，仕履備著於《明史》。述作甚夥，詩古文詞咸有

法度。有明三百餘年，刊本不一。余初得觀芝田令萬里續梓本於金陵，裁錄其詞。漸又見麗水何鐘刊本，以相讎校，初無同異，惟〈阮郎歸〉「曉寒楊柳」以下十首，何本在〈渡江雲〉「晚晴池館」一首下，而萬里本則在卷末〈滿庭芳〉「積雨沉昏」後耳。比聞吾鄉陶蘭泉觀察湘得明初刻本，依樣付梓，不日斷手，當更圖假校，俾合成完璧也。癸酉四月，趙尊嶽書。

乙亥秋七月，陶本甫殺青，因得假校一過。其編次蓋與麗水本同，文字亦無同異。前有葉蕃序一篇。按之爲洪武十三年刊本，題《寫情集》，實爲劉詞之祖本。凡分四卷，自〈河傳〉「江上作」至〈怨王孫〉「翠被」一首，爲第一卷；〈謁金門〉至〈蝶戀花〉「春夢」一首，爲第二卷；〈摸魚兒〉「晚春」至〈清平樂〉「春風」一首，爲第三卷；〈錦堂春〉至〈滿庭芳〉「清明」，爲第四卷。不知麗水覆鏤，何以合四卷爲一篇。陶刻精整，幾可亂真，讎校之餘，并遂錄葉序以冠茲刻，用存全豹。尊嶽再記於宣武城南。夜鐙人靜，漏下兩鼓，明河在天，斯景清絕，恰宜詞境，未易輕忘也。

丁丑三月，據何本、陶覆本重校。珍重閣。

### 177 類編箋釋國朝詩餘五卷 長洲錢允治功甫編 長洲陳仁錫明卿釋

允治，初名府，字功甫，長洲人。錢穀子，後以字行。生萬曆間，貧而好學，年至八十餘，隆冬病瘍，映日鈔書，至暮不止。沒，無子，遺書類多散佚。有《少室先生集》及《國朝詩選》五卷，同邑陳仁錫爲合編《草堂詩餘選箋》行之。仁錫字明卿，天啓進士，授編修，典誥勅，以不肯撰魏忠賢鐵券文落職。崇禎初，召復原官，累遷南京國子監祭酒。卒諡文莊。生平講求經濟，喜著書，有《繫詞》、《易經頌》、《重訂古周禮》、《四書考》、《史品赤函》、《古文奇賞》、《蘇文奇賞》諸書行世，雖不免空疏之弊，亦所謂篤學好事者矣。所箋《詩餘》，僅及餽訂，因爲刪乙而重梓之。原書疏於校勘，茲略加讎讀，初不能盡正其魯亥。明人選明詞，本不多見，亦足珍闕也。乙亥冬至，武進趙尊嶽記。

丁丑三月十三日，據原刊本校並酌補數字。珍重閣。

### 178 古今詞匯二編四卷 仁和卓回方水輯選

方水，字休園，卓人月弟。性好柔翰，治詞章，不樂仕進，旅游閒暇，手鈔古今詞，與大梁周雪客諸君子參訂，爲《詞匯》三編，事詳所述緣起中。原書梓行於

康熙間。前有陸階、嚴沆、金鎮、魯超諸序，又輯諸家詞話、毛稚黃詞韻各一卷，合而行之。原板傳世極罕，兼金不可得致。南陵徐氏積學齋獲藏其書，因就假讀，並手錄覆本，存之篋中，忽忽已逾十稔。比者彙刻明詞，因取其二編別爲鈔本。明人選明詞者不多，嘗鼎亦庶足以快一嚙耶。乙亥臘日，高梧軒校記。

丁丑穀日校讀一過。未邕。

### 179 林下詞選四卷 吳江周銘勒山選

《林下詞選》十四卷，吳江周勒山銘選輯。勒山，康熙時人。幼學媚古，尤擅詞翰，嘗選其鄉先賢詞，曰《松陵絕妙詞選》；又古今名媛所製詞，曰《林下詞選》，謂爲有林下風也。選一至四卷爲宋詞，五卷元詞，六至九卷爲明詞，下此爲清詞。前有尤西堂、吳憐庵、趙子氏序，及勒山自題〈鶯啼序〉一闕。原板久燬，其書不易復得，而余獨得其完整者，藏之篋衍垂二十年。比輯刻明詞，獨少金閨玉臺之作，所藏《衆香集》董大理綬經又已爲刊行，則取次斯選，自六至九卷，爲一一重刊，別以補遺中明媛之作附麗其後，庶合諸明詞爲全璧，存此麗製於芸編云。甲戌秋望，珍重閣書。

丁丑穀日校原刊本。未邕。

### 180 陶學士詞一卷 當塗陶安主敬撰

右《陶學士詞》一卷，蓋自全集中裁篇別出者也。按主敬少從耆儒李習游，元至正初舉鄉試，授明道書院山長，避亂家居。太祖渡江，安與習率父老出迎，太祖與語，善之，留參幕府，授左司員外郎。洪武初，命知制誥，兼修國史，歷江西行省參知政事，卒。安尤長《易》學，筮驗若神。國初議禮，宋濂以外艱家居，率安爲裁定之。福王時追諡文憲。所著題《陶學士集》，余得之於金陵，因爲屬鏤者也。丙寅七月，叔雍。

丙子除夕，校益山藏明刊本。高梧。

### 181 扣舷詞一卷 長洲高啓季迪撰

季迪博學工詩，家北郭，與王行輩十人卜居相近，號「北郭十友」。又以能詩，號「十才子」。張士誠據吳，名士雲集，季迪獨寓外家，在吳淞江之青邱，自號「青邱子」。洪武初，爲編修，與修《元史》，累官戶部侍郎。自陳年少，不敢當重任，

乃賜白金放還，授書自給。知府魏觀爲之移家入郡，旦夕延見，歡洽無比。後觀以改修府治獲譴，帝見其所作〈上梁文〉，怒之，腰斬於市，年甫三十有九。所著《大全集》、《（鶯）〔鳧〕藻集》。余則以文瑞樓刊本摘錄其詞者也。戊（寅）〔辰〕二月，高梧軒。

丁丑元日校《四部叢刊》本。未邕。

### 182 眉庵詞一卷 姑蘇楊基孟載撰

孟載，字眉庵，九歲能背誦六經。及長，著書十餘萬言，名曰《論鑿》。嘗於楊維禎座上賦〈鐵笛歌〉，維禎驚喜。與高啓、張羽、徐賁，號「四傑」。兼工書畫。洪武初，官至山西按察使。著《眉庵集》，詞即附載集中。余得其集於杭州，遂錄其詞焉。戊（寅）〔辰〕八月，叔雍。

丁丑元日，校傳鈔西泠書藏本。高梧。

### 183 道山詞一卷 浦江鄭棠叔美撰

叔美，濂從子，受學於宋濂，有文行。永樂中，官至翰林檢討。著《金史評》、《道山集》。浦城鄭氏有世德，其祖文嗣十世同居，凡二百四十餘年，一錢尺帛不敢私。元至大間旌表其閭，世稱「義門」者也。乙巳元月，叔雍。

同日校傳鈔西泠書藏本。高梧。

### 184 九霞山人詞一卷 句吳顧起綸玄緯撰

顧玄緯，起元弟，字更生，別號元言。從父可學挈之京師，代爲祝釐應制之文，多稱帝意。以國學生累官鬱林州同知，致仕。玄緯豪於文酒，善書法。其昆季於嘉靖間，以校輯《王右丞詩》、《會真記》等書名於世，顧其所著《九霞山人集》獨罕傳。今年盛暑，觀書於四明范氏天一閣，《山人集》赫然在焉，然前後蟲傷殘破，不忍觸手。卷一後附詞三闕，幸未損字，亟命胥錄於閣中，以貽我叔雍詞長，刊入明人詞輯中，備一格焉。宗弟萬里記。

同日校趙斐雲傳鈔本。未邕。

### 185 西村詞一卷 海鹽朱樸元素撰

元素，正、嘉間人。工詩，隱居西村不仕，詩集即以「西村」名，多與文衡山

唱酬之作。余初得之於浙江西湖書藏，僅詞二首，而〈念奴嬌〉猶有闕文，蓋集本遺脫，恨非全豹。既而張菊生先生乃以補詞三首見示，因并彙刊之。癸酉仲冬，叔雍。

同日校傳鈔本。高梧。

### 186 箬谿詞一卷 長興顧應祥惟賢撰

應祥，弘治進士，授饒州府推官。桃源洞寇亂，掠樂平令去，應祥單身詣賊壘出之，賊亦解。歷廣東僉事，擒剿海寇雷振等，半歲三捷。累遷刑部尚書，奏定律例。時嚴嵩專橫特甚，應祥以耆舊自處，嵩不悅，以原官改南京，致仕歸卒。著《惜陰錄》、《人代紀要》、《尚書纂言》、《歸田詩選》、《南詔事略》等書。又精算術，著作亦夥。應祥嘗受業王守仁，因復作《傳習錄疑》、《龍谿致知議略》諸書，詞在《歸田詩選》中，茲輯出單行之。癸酉臘日，叔雍。

同日校傳鈔北海集本。高梧。

### 187 饑豹詞一卷 豐城李萬年惟衡撰

萬年，字維衡，號茫湖，江西豐城人。弘治時官至刑部尚書郎。遺集八卷，題《饑豹存稿》。卷八詞調三十八首，僅此一首為詞，餘皆南北曲也。過拍「青蛇壯氣」不協律調，姑以存之，備明詞家數云。癸酉仲春，圭璋社兄自金陵寄示，為識其崖略。是年仲秋，珍重閣書。

同日校傳鈔本。未邕。

### 188 觀槿長短句一卷 寶應吳敏道日南撰

敏道，號南莘，又號射陽畸人。以孝名鄉黨間，不樂仕進，以布衣終老。隆慶庚午，自刊其集，名《觀槿稿》，凡詩賦六卷，長短句殿焉。茲為輯錄，俾叔雍兄校刊明人詞集之一助。癸酉長至，海寧趙萬里記。

同日校傳鈔本。未邕。

### 189 西村詞一卷 松陵史鑑明古撰

明古，弘治己未進士。於書無所不讀，尤長史學。家居水竹秀茂，亭館相通。客至，陳三代秦漢器物及唐宋以來書畫名品，相與鑒賞。好著古衣冠，曳履揮塵，

望之者如神仙居，人稱「西村先生」。著《西村集》。朱竹垞《靜志居詩話》謂其撰曾祖墓志，僅稱權推為稅長，質實不華，非同後世之冒濫，足知其文行。此蓋自明刊本迳錄者也。戊（寅）〔辰〕八月，叔雍。

丙子元月四日，校傳鈔益山書藏明刊本。未雍。（丁丑誤作丙子，有年光倒流之夷。）

### 190 清江詞一卷 崇德貝瓊廷琚撰

瓊，一名闕，字廷琚，又號廷臣。元末領鄉薦，遭亂退居爰山。博覽經史，尤長於詩。洪武初，徵修《元史》，除國子監助教，與張美和、聶綬齊名，時稱「成均三助」。著《清江集》附詞。余初得寫本於金陵，既以《四部叢刊》景明初刊本校之，以附槧焉。戊辰二月，叔雍。

同日校明景刊本。高梧。

### 191 半軒詞一卷 長洲王行止仲撰

止仲，自號澹如居士，又號半軒，亦號楮園。淹貫經史百家言，富人沈萬三延之家塾，每文成，酬以白金，行輒麾去。洪武初，延為學校師。已而謝去，隱於石湖。其二子役於京，行往視之。涼國公藍玉館於家，數薦之。後玉被殺，行父子亦坐死。行善潑墨山水，著《二王法書辨》、《半軒集》，詞附。茲為別行，以廣其傳云。戊（寅）〔辰〕四月，叔雍。

### 192 灑谿草堂詞一卷 華亭孫承恩貞父撰

貞父，正德進士，歷官禮部尚書，兼掌詹事府。時齋宮設醮，獨不肯黃冠，遂乞致仕。卒諡文簡。貞父篤學，博稽宏覽，為文深厚爾雅。著《灑谿草堂稿》，余得讀於西湖書藏，因錄副本，並紀其仕履。己巳四月，高梧軒。

同日校傳鈔本。未雍。

### 193 偃庵詞一卷 建安楊旦晉叔撰

晉叔，太師楊榮曾孫。弘治進士，歷官太常卿。以忤劉瑾，謫知溫州，治績最著。瑾誅，累擢至南京吏部尚書，轉北京吏部尚書，漸以事為陳洸所劾，致仕。事跡俱附載《明史·楊榮傳》中。所著《偃庵文集》十卷，有旦自序，其少子襄又為增輯梓行。詩多題識贈遺之作、和平忠愛之音。帳詞附詩後，茲汰其駢序而存其詞

焉。癸酉十一月，高梧軒書。

同日校傳鈔西泠書藏本。未邕。

#### 194 全庵詩餘一卷 錢塘胡文煥全庵撰

文煥，字德甫，號全庵，一號抱琴居士。文詞曲無所不通，於萬曆中設文會堂於虎林，廣刊四部典籍，並手輯《琴譜》、《古器具名》、《詩家彙選》諸書，又以雜著數十種合梓行世，所謂《格致叢書》者是也。此從所編《游覽粹編》中輯出，以備明詞之一家。何當得其全璧，用行於世，庶與南宋陳道人後先踵美與。癸酉長至，趙萬里識。

同日校北海書藏本。未邕。

#### 195 松籌堂詞一卷 吳縣楊循吉君謙撰

循吉，字君謙。成化進士，授禮部主事。善病，好讀書，致仕歸，年甫三十有一。結廬支硎山下。惟性狷隘，好論人短長。武宗駐蹕南都，召賦《打虎曲》稱旨，易武人裝侍御前。善爲樂府小令，帝以優俳畜之。循吉以爲恥，辭歸。晚歲益落寞，堅癖自好，卒時年八十九。著《松籌堂集》。北海書藏得原刊本，斐雲宗兄過錄見惠，因輯入明詞別集云。癸酉長至日，叔雍。

丁丑五日，校傳鈔明刊本。高梧。

#### 196 黎陽王太傅詩集一卷 濬縣王越昌世撰

越，字昌世，濬縣人。景泰進士，漸官至兵部尚書，以功封威寧伯。事誼具見國史本傳。集稱王太傅者，蓋贈官也。今年仲夏，得正德刊本於海上，乃四明范氏天一閣故物。中附詩餘十五首，亟錄出以貽叔雍宗兄，聊備明詞一格焉。癸酉八月，海寧趙萬里記。

同日校傳鈔天一閣藏本。未邕。

#### 197 枝山先生詞一卷 長洲祝允明希哲撰

允明，字希哲，號枝山，又號枝指生，長洲人。弘治五年舉人，授興寧令，遷應天通判，謝病歸。有《寰星堂集》三十卷，案《靜志居詩話》，有《祝氏集略》，又有《金縷》、《醉紅》、《窺簾》、《暢哉》、《擲果》、《拂絃》、《玉期》等集。今存殘

本四卷，詞附見集中。余得讀於江寧益山書藏，因飭胥錄副，重付剖氏。迨刻成，又得斐雲宗兄函，謂北海書藏有嘉靖甲辰謝雍手鈔《枝山集》，可以互校，遂復寄勘正，此書庶可爲善本矣。癸酉臘月，珍重閣。

同日合校兩本。未邕。

### 198 閩風館詩餘一卷 馮詡馬朴敦若撰

朴，字敦若，同州人。萬曆四年舉人，官至雲南按察使，彌有循聲。著述繁富，《閩風館全集》凡六十二卷，詩賦古文無不畢具。卷二十一、二爲詞，而〈黃鶯兒〉、〈玉芙蓉〉、〈清江引〉等南北小令並廁其間，則編者未暇細爲類例也。原書藏北海書藏。乙亥伏日，道暑都城，得加披錄，因合之爲一卷，以付傳梓云。高梧並記。

丙子臘月下澣，校北海藏本。未雍。

### 199 蒲山漁唱一卷 蒲圻魏觀杞山撰

觀，蒲圻人。元末隱居蒲山，明太祖起兵下武昌，聘授平江學正。洪武初，建大本堂，奉命侍太子說書，授諸王經歷，累遷至祭酒。廷臣交章薦其才，出知蘇州府，親賢任能，彌著惠政。後以遷治事被譖，伏誅。高啓亦罹大辟。帝尋悔之，命致祭歸葬。遺集題《蒲山漁唱》。余在京師得見成化刊本，三詞並在集中，爲逐錄之。乙亥仲春，叔雍書。

同日校北海書藏成化刊本。高梧。

### 200 來復齋詞一卷 吉州劉鐸洞初撰

劉鐸，字我以，別號洞初，安城南里三舍人。父鳴岐，虔奉關侯像而生鐸，骨相神異，宛肖關西。幼穎悟，受知胡瞻明。入邑庠，而困於諸生者十年，擔石無儲，豪氣橫逸。萬曆丙午，舉於鄉。越十年丙辰，成進士。殿試本擬拔第一，以小故抑之。初任刑部主事，又奉使隴右。歸來，重入秋曹，因欲平反內臣陳正己殺商人李朝事，大忤魏璫。璫畏其才，屬人求草書，意以諷之。不少顧，遂出之。守揚州，有治聲。璫益銜之，授意田爾耕以詩語訕謗，緹逮之，官民爲之遮道。已而朝審得釋，乃復原職，竟不詣璫一謝。於是又以戚畹李承恩獄逮繫，亦竟不屈。璫復陷以巫蠱事，屬薛貞鍛鍊成獄，加以慘酷。鐸被刑，逕斥璫逆，終赴西市。宜人蕭

氏及七歲幼女欲從死，鐸止之。臨刑，賦絕命詩：「大限年來五十三，翻身跳出是非關。魂魄先從三島去，詩書率付六丁擔。無棺任憑魚腹葬，有首徒教野狗銜。龍逢比干歸泉下，此去相逢面不慚。」又作別妻女詩數章。迨莊烈嗣位，始旌葬之。蕭宜人扶櫬以還。子一：兆幟；女淑，適同里王石鯨巡撫次男靄。靄矢死撫孤。迨寇至陷吉城，脫珥以餉義師，士民爲之感泣。遺著詩文多散逸，淑爲輯刊之，又請於其同年瞿式耜爲銘其墓，內姪蕭琦爲序其書，而自係以跋，集凡十卷，詩賦古文，粲然俱備。詞在五卷中，茲爲裁篇別行，亦以作正氣於海岳之際、陽九之秋也。乙亥伏日大暑，武進趙尊嶽記。

同日校原刊本。未雍。

### 201 種蓮詩餘一卷 遼藩朱憲燦□□撰

憲燦，遼王植六世孫。植爲太祖第十五子，封遼王，國於廣寧，旋改荊州者也。憲燦於嘉靖中襲王爵，以篤奉道教，爲世宗所寵信，賜號「清微忠教真人」。敏慧絕世，而行多縱佚。隆慶初，坐罪降爲庶人，國除。著《味祕草堂集》、《種蓮歲稿》傳世。八詞散見《種蓮集》中，爲別存之。乙亥仲春，浚儀趙尊嶽。

同日校北海藏本。高梧。

### 202 履庵詩餘一卷 宜興萬士和思節撰

士和，字思節，號履庵，嘉靖進士。隆慶中，以禮部左侍郎引疾歸。萬曆初，起爲禮部尙書。條上崇儉數事，又以菑侵屢見，奏乞杜倖門、容慧直、汰冗員、抑干請，多犯時忌。卒忤張居正，謝病以去。居正歿，起爲南禮部尙書，不赴。卒謚文恭。有《履庵集》。詞非所工，而恬澹俊雅，猶存風骨，爲付梓人，並記歲月。乙亥仲春，高梧軒。

同日校傳鈔北海藏本。未邕。

### 203 世經堂詞一卷 華亭徐階子升撰

階，字子升，嘉靖進士，歷禮部尙書，東閣大學士。時嚴嵩爲首輔，深嫉之。階才智足以見馭，嵩不能圖。嘗密疏仇鸞罪狀，鸞坐得罪。外事嵩甚謹，內深自結於帝，卒逐嵩，盡反其行事。屏絕苞苴，收名人望，優假言官，稗政多所匡救。後爲高拱所扼，致仕歸。卒謚文貞。有《世經堂集》、《少湖文集》行世。詞多酬應之

作，同在集中，茲特爲裁篇，以合之隆萬諸家云。乙亥仲春，叔雍。

同日校傳鈔北海藏本。高梧。

#### 204 處實堂詞一卷 長洲張鳳翼伯起撰

鳳翼，嘉靖間舉人。工文學，尤長於南北曲，所著《紅拂記》等傳奇，被之絃管，有聲於時，又有《處實堂集》、《占夢類考》、《文選纂注》、《海內名家工畫能事》諸書，均盛行於世。《四庫》並著錄其集。詞八首，在第四卷中，爲裁存之。乙亥仲春，珍重閣書。

同日校傳鈔北海藏本。未雍。

#### 205 吹劍詩餘一卷 涇上范守己介儒撰

守己，字介儒，萬曆間進士，官至按察使僉事。有《肅皇外史》、《御龍子集》、《郢堊集》、《吹劍草》諸書，《四庫》著錄。《郢堊集》中附樂府，渴欲求得，卒不易致，而京師書藏藏目有《吹劍集》。乙亥仲春，養疴北行，客豫邸者經月，抽暇往讀，於卷二十中得五詞。嘗鼎一臠，聊副宿懷，亟爲輯錄，以廣余明詞之囿。叔雍校餘並記。

同日校傳鈔北海傳藏本。未邕。

#### 206 薇垣詩餘一卷 山陰王濬初啓哲撰

濬初，字啓哲，山陰人，隸太同府。萬曆乙酉舉人，旋官內閣。著《薇垣小草》，傳本不多見。乙亥仲春，病客宣南，就北海書藏得讀一過，爲輯存之。叔雍。

同日校傳鈔北海藏本。未邕。

#### 207 瑞峰詩餘一卷 漳浦盧維楨司典撰

維楨，隆慶戊辰進士，由吏部主事，歷考功、文選郎中。擢進孤寒，品藻精密。旋擢光祿寺卿，具疏議歲派上供改折，及良醞、珍羞二署弊端，上嘉納之。累遷至工部右侍郎，代總督倉場事。以忤當道，上疏致仕。策蹇出都門，年始艾也。與朱天球結社梁山之麓。卒贈戶部尚書，賜祭葬。有《醒後集》傳世。按黃虞稷《千頃堂書目》，載盧維楨《瑞峰集》六卷，實即《醒後集》，集五卷，續一卷，故云六卷。維楨號瑞峰，又號水竹居士。《醒後集》題水竹居士而不著姓氏。既考集中奏

疏題名及《漳州府志》，始得舉其行誼。斐雲宗兄就北海藏本錄詞見畧，爲刊存之。乙亥仲春，尊嶽跋記。

同日校傳鈔北海藏本。未邕。

## 208 簡齋詩餘一卷 曲周劉榮嗣敬仲撰

榮嗣，字敬仲。萬曆丙辰進士，授戶部主事。管銀庫，矯發金華銀濟邊，雖獲罪不恤。累遷至工部尚書，總督河道。挽黃治洳，備極勞瘁。爲忌者所中，逮繫卒，士論惜之。性孝友，好賓客，詩文書畫皆卓然名家。有《簡齋集》行世，詞則附載集中卷十一者也。乙亥仲春，叔雍記。

同日校傳鈔北海藏本。高梧。

## 209 師竹堂詞一卷 信陽王祖嫡胤昌撰

祖嫡，字胤昌。父詔，官信陽指揮僉事，因註誤，鐫世秩。祖嫡以胄子舉於鄉，上書闕下，白父冤，得復故爵。隆慶辛未成進士，改庶吉士。呂文簡公謂有忠孝大節，雅愛重之。時同官有毆斥掾屬者，江陵當國，手笏欲加窮治，祖嫡獨前進奮言，其事遂解。授檢討，垂十年，丁內艱歸。廬墓側起遷國子司業，上疏請釐正革除間事，得旨俞允，時論偉之。旋預修玉牒，上賜四品大紅羅衣一襲。又撰〈明因寺碑〉，中有「塗膏爨血」語，微以示諷，偶達慈寧宮，恩賚甚厚。擢宮庶，以妻喪請告歸。維風正俗，里社士習爲之丕變。晚習禪誦，屬續之日，神氣愴然。著《師竹堂集》，詞附，蓋所以爲輔弼啓沃之資，語詳小序中，亦詞苑所罕見者也。乙亥仲春，北游京師，得見《三怡堂叢書》本，逐錄一過，斐雲宗兄復以雍正間其裔孫兌之手鈔本校正數字，爲付劄人。高梧跋記。

同日校北海藏本傳鈔本。未邕。

## 210 雲松近體樂府一卷 鄞魏僞達卿撰

魏僞，鄞人。官至石城訓導。著《雲松詩略》八卷，翰林院庶吉士泰和歐陽鵬爲之評點，蓋明人刻書標榜之陋習也。書爲弘治原刊本，舊藏天一閣，其卷七載詞十二首，爲裁錄之。乙亥八月既望，高梧軒。

同日校北海藏本。未邕。

## 211 青金詞一卷 金壇史遷良臣撰

遷，字良臣，一號清齋，金陵人。元季隱居，以教授自給。洪武初，累徵始起，為蒲城令，陞忻州守，後改廉州，所在有治績。著《青金集》八卷，原書刊於成化間，傳世甚罕。四明盧氏抱經樓藏傳鈔本，此則就鈔本乙錄者也。乙亥八月，叔雍記。

同日據北海書藏藏抱經樓本校。未邕。

## 212 雁蕩山樵詞一卷 樂清章玄應順德撰

玄應，字順德，樂清人。其先為吳姓，恭毅公綸長子，從宦留都中鄉試。以言者論其大臣子有嫌，復還為邑諸生。試浙省，復中式，繼成進士，任南京禮、工二科給事中。慷慨敢言，有父風。孝廟初，常陳五事，又悉按劾中貴之招權亂政者，累官廣東布政使。所著有《曼亭稿》。弟玄會，應天通判。子九儀、九仁，咸有雋才。九仁子朝鳳，登進士第。玄應之孫朝鳳，疏復吳姓。《雁蕩山樵集》則為嘉靖中朝鳳官閩中時所刊，故均題吳玄應也。詞在第十五卷中。《曼亭稿》未之前見，此則北海書藏有刊本，余遂得展轉假錄，並志其行誼於右。丙子歲朝，珍重閣。

丙子臘月廿七，校京師書藏明刊本。高梧。

## 213 紋山先生詩餘一卷 永安羅明祖宣明撰

明祖，字宣明，福建永安人。天啓辛未進士，歷官華亭、繁昌、襄陽令。尤精於律算青鳥、渾天格物之學，迭上平寇議於總督楊嗣昌，頗忤時俗。卒時年四十四，友人寧化李世熊為之傳。著《紋山先生集》三十卷，詞在卷九中，雖律調乖誤，而其人忠勇奮發，亦在可傳之列也。丙子初春，珍重閣書。

同日校京師書藏本。未邕。

## 214 醒園詩餘一卷 河東李嵩醒園撰

嵩，平陽榮河人。萬曆三十二年進士，累官至監察御史。著《醒園文略》二十卷、《雜詠》一卷、《疏草》一卷，亦一時敢言之士也。詞在《文略》卷五中，為別存之。丙子人日，高梧軒。

同日校京師書藏明刊本。未邕。

## 215 百川先生長短句一卷 常熟孫樓子虛撰

樓，字子虛，常熟人。嘉靖丙午舉人，官湖州府推官，改漢中，致仕歸。性好書，杜門讎校，晝夜不輟，所藏逾萬卷。著《百川集》、《麗詞百韻》，《四庫存目》著錄及之。《麗詞》未及見，《百川集》卷十二為長短句，因輯存之。丙子四月，高梧識於京師旅邸。

同日校京師書藏明刊本。未邕。

## 216 羣玉樓詩餘一卷 甌寧李默時言撰

默，字時言，甌寧人。正德辛巳進士，官至吏部尚書兼翰林學士。為趙文華誣陷，下詔獄瘐死。萬曆中追諡文愍，《明史》有傳。此蓋從明刻《羣玉樓集》、《困亨別稿》輯錄者，前二首見集本卷六，後二首見《別稿》卷一也。丙子四月，京師旅邸兩窗校記，趙尊嶽。

同日校京師書藏藏本。未邕。

## 217 誠齋詞一卷 周藩朱有燾□□撰

有燾，周定王長子，高皇帝孫。洪熙元年襲位，景泰三年卒。史稱其博學善書。著《誠齋錄》四卷、《雜錄》如千卷。又長南北曲，其雜劇三十一本盛傳於世，論者以為有明曲學之盛，實出藩封振導之力。詞附載《誠齋集》卷四，因為裁篇別出云。丙子展上巳日，高梧。

同日校京師書藏明刊本。高梧。

## 218 古庵先生詞一卷 武進毛憲式之撰

憲，字式之，別號古庵，武進人。正德進士，官給事中。時內侍擅權，國事日壞，憲疏大臣怙勢為姦利者數人，內外肅然。武宗儲嗣未建，舉朝諱不敢發，憲疏請不報，謝病以歸。憲生平敦行誼，矜名節，學者稱「古庵先生」。著《古庵文集》、《諫垣奏草》，詞亦雅潔駘盪。吾鄉於有清一代以詞開派學者，彌不宗皋文、翰風（雨）〔兩〕先生，謂詞體之尊、詞義之博，惟兩先生實昌其端緒，庸詎知三百載前古庵先生已肇椎輪大輅之始乎？寒夜勘讀，為并紀其仕履。丙子元日，邑後學趙尊嶽謹跋。

同日校京師書藏藏本。珍重閣。

### 219 堇山詩餘一卷 鄞李堂時升撰

堂，字時升，號堇山。八歲日記數千言，屬對敏給，甫成童，廩於郡庠。登成化丁未進士，授工部主事，監稅蕪湖。時中官宋昂怙巨璫李廣勢，恣橫阻，堂爲力禁，歷陞營繕、屯田二司，多所興革。適清寧宮災，以郎中承敕督建，首請發內帑，免徵天下，以蘇民困，答天戒。修復之際，又多省抑。時提督英國公張懋、兵部尚書馬文升、工部尚書徐貫等既聯章具保，陞京職二級，堂三疏辭免。明年，敕建禮部，（與）〔興〕修闕里，費皆取諸夙羨，民用不擾。又沮兵部之請，罷築京師外城，停南京內府不急工役。凡所具奏，皆主厚培民力，切中時弊。旋陞應天府丞、南京光祿卿，改僉都御史提督操江，陞工部右侍郎。汴、徐河患告急，敕兼左僉都御史總理修築，而鎮守河南太監廖紀以堂嚴於提遏，伎恚媒藥，遂謝病歸。閉門纂述，多崇正學。著《堇山文集》，詞附見，爲裁存之。丙子季春，趙尊嶽記。

同日校京師書藏藏本。高梧。

### 220 四留堂詞一卷 南海盧龍雲少從撰

龍雲，萬曆癸未進士，補邯鄲令，治行爲諸郡邑最。復補長樂，以忤權要，左遷江西藩幕，轉雲南大理寺副，晉戶部員外郎，陞貴州參議，卒於官。其治苗夷，尤得撫循之道。著《四留堂集》、《尚論全篇》、《易經補篆》、《談詩類要》諸書，詞則在集本卷十七，逐錄校梓也。丙子春夜，叔雍。

丙子小除夕，據北平圖書館傳鈔本校。高梧。

### 221 洗心亭詩餘一卷 平涼趙時春景仁撰

時春，字景仁，號浚谷。嘉靖會試第一，選庶吉士，歷兵部主事。以言事切直，黜爲民。久之，授翰林編修，復以言事黜。京師被寇，起官擢御史，巡撫山西。思以武功自奮，旋遇寇於廣武，一戰而敗，時將帥多避寇退去，功雖不就，天下壯之。尋被論解官歸。平生讀書強記，文章豪肆，詩亦伉俚自喜。詞曲合爲《洗心詩餘》一卷，門人周鑑爲之序，男守嚴於隆慶間刊行之。余得其原刊本，因輯次其詞，別爲鈔本，以彰吾宗之典雅。惜有闕葉，無自校補也。丙子灌佛日，尊嶽跋記。

丙子小除夕，據明刊本校。未邕。

## 222 白房詞一卷 永州朱哀子文撰

《白房詞》，明朱哀撰。哀字子文，湖廣永州人。弘治十五年壬戌科進士，選翰林庶吉士，拜監察御史。以忤劉瑾，謫縣丞。瑾敗，起擢南禮部郎中，出補雲南參議，轉按察副使，進參政。《明史》無傳，事蹟具詳過庭訓《分省人物考》。俞憲《皇朝進士登科考》卷九，亦載哀登康海三甲進士，湖廣永州衛籍，直隸長洲縣人。哀蓋江南人而著籍湖廣者，與黃虞稷《千頃堂書目》所載著有《三峰文集》諸書之上虞朱哀字朝章者，當別為一人。哀在弘、嘉朝，以能為柳州文見稱於時。過庭訓謂其文颺回雲結，峯嶺崎嶇，其所蘊蓄，人莫能測其涯涘。餘事為詞，亦復自鳴天籟，不為空綺，奇思壯采，比之陳聲伯、王子衡輩，殆如驂斬，是蓋能以古文行氣之法通於聲學者。詞凡七闕，從吳興劉氏嘉業堂所藏正德刊本《白房集》中錄出。叔雍嗜搜明詞，因遂寫付梓。發潛闡幽，同聲冥契，爰為考其大略如此，并以補王昶《明詞錄》之漏列云。丙子夏，匊厂黃孝紓識於墨謔頤。

同日據劉氏藏本校。高梧。

## 223 徐卓晤歌一卷 杭州徐士俊野君 卓人月藥淵撰

徐士俊，原名翹，字三有，號野君，明季仁和人。工文翰，尤長樂府，庶與王關、馬、鄭相抗手，所著《絡水絲》等劇本盛行於時。卓人月，字珂月。別有《藥庵詞》一卷，已為授梓。《晤歌》蓋二人賡唱迭和之作，附刊於《詩餘廣選》之後者也。《廣選》凡十六卷，輯自唐五代，迄於明季，一一加以箋評，裒然巨帙，初不甚精。明季選家所好如此，收名有餘，定價不足，無可為諱。歲在丙子天中節，遂錄授梓，並為跋記。珍重閣。

丁丑三月十五日，據原刊本校。高梧。

## 224 藥淵詞一卷 仁和卓人月珂月撰

人月，字珂月，明季仁和人。性耽琴書，好文詞，浪跡江湖間，蓋眉公一流也。著《藥庵集》、《詩餘廣選》、《晤歌》，拈聲訂韻，無間晨夕。《藥庵集》卷十二為詞，即茲刻之祖本。《晤歌》與徐〔士〕俊相酬唱，亦待授梓。《詩餘廣選》則輯錄唐宋以來詞凡十六卷，裒然鉅製，以所收明人之作無幾，故未為鋟木。王言遠稱

其詞有意出新，獨開生面，但於宋人蘊藉處不無快意欲盡之病，信非虛語也。乙亥孟夏，高梧並記。

丁丑季春十一日，校北海書藏全集傳鈔本。雍。

## 225 艷雪篇一卷 震澤葛一龍震甫撰

一龍，字震甫，吳縣人。崇禎間，由貢生選授雲南布政司理問。有《尺木齋》、《艷雪篇》諸集，竹垞謂讀之未免有楓落吳江之憾，蓋微詞也。此從明刊集中選寫，題鑑湖蔣挺植之校。前有吳江周永年序，茲併存之。乙亥四月下澣，叔雍書。

同日校傳鈔北海藏集本。珍重閣。

## 226 丹峰詞一卷 上虞徐子熙世昭撰

世昭，上虞人。弘治辛酉鄉試第三，乙丑成進士，授兵部職方司主事，區畫有方。正德戊辰，充會試同考官，再典武舉，咸慶得人。陞武庫司員外郎，應制直文華殿，晉光祿少卿，乞詞翰者無虛日。世昭淹貫經史百家，下筆語高意古，不落時格，或勸其少為貶損者，益篤志好古。襟懷磊落，不拘小節，論議若懸河，下筆千言，尤善草書。事繼母至孝，處昆季間不私一錢，臨終惟諄諄以孝友訓諸子。著《貽穀堂集》，余所見者，為其孫南京工部主事啓東萬曆間所校刻之《丹峰先生文集》，當為其私諡也。詞雖不工，饒有逸趣，為錄存之。乙亥孟夏，高梧軒書。

同日校傳鈔北海本。未邕。

## 227 平山詞一卷 上虞徐應豐德中撰

應豐，子熙子。初游泮，善屬文，尤工楷法。嘉靖間，由儒士考選制敕房中書，奉詔侍直，時承晉接。會相嵩怒從弟學詩敕奏，疑有所授，以京察罷黜。一日，上問：「徐中書安在？」左右以實對。上云：「徐應豐侍辦御典，著留用。」晉禮部主客司郎中。逾年，竟誣以他事，廷杖，削為編民。應豐素性鯁直，不屑治生，以故賞賚所得，悉以濟人，歸惟圖書數卷而已。居家事二兄若嚴父，有不平者，片言立解，人爭重之。所著詩稿，併刊于《貽穀集》，惟別題《平山先生集》，以別於寶豐之《丹峰先生集》而已。子啓東，官南京工部主事，集本即所手刊也。詞見第五卷中，茲與《丹峰詞》合行之。己亥孟夏，叔雍記。

同日校傳鈔北海藏本。高梧。

## 228 十賚堂詞一卷 吳興茅維孝若撰

孝若，號僧曇，坤季子。能詩，與同郡臧懋循、吳稼澄、吳夢暘並稱「四子」。萬曆四十四年，北闈登乙榜。先是，見楊漣擊璫疏，遂發憤上葉福清相國奏記，福清不能用其書，而京師一時傳誦，謂為曲突書。著《十賚堂》甲、乙、丙、丁四稿，詞在《丙集》卷十二，凡三十六闋。《甲》、《乙稿》中遍檢無他詞也。彊邨侍郎輯《湖州詞徵》，甄錄四首，均不見《丙稿》，當從選本所得，知茅詞之散落者多矣。吳興劉氏嘉業堂旋得《四稿》，臨桂況蕙風先生嘗見之，馳書告尊嶽，後擬往錄副本，而北海書藏已寫寄，近始付刊。蕙風先生謂其筆近沈著，未墜先正典型，洵知言也。乙亥孟夏，尊嶽校讀記。距蕙風先生之歿，忽忽蓋且十年，發緘猶新，人琴之痛，曷其能已，因並志之。

同日校傳鈔北海藏本。珍重閣。

## 229 式齋詞一卷 太倉陸容文量撰

文量，成化丙戌進士，初官兵部職司郎中。西方進獅子，請大臣往迎，進諫，止之。累遷至浙江右參政。性至孝，嗜書籍，與張泰、陸釳齊名，以忤權貴，罷政歸。《明史·文苑》有傳。著《式齋集》三十七卷、《菽園雜記》十五卷。詞雜廁詩集中，不別為詮次。茲董輯別裁，用廣其傳焉。乙亥四月望日，叔雍校寫並記。

同日校北海藏本傳鈔本。高梧軒。

## 230 斗南先生遼陽詩餘一卷 江陰黃正色士尚撰

正色，字士尚，號斗南。官南海令，擢南臺御史。後以罪謫戍遼東瀋陽衛，欣然就道，無羈旅窮（然）〔愁〕之態。其安命自得，忠義所發，往往見於歌詩。在遼幾三十年，穆宗初始歸。陞南太僕卿，旋乞致仕。萬曆丙子九月卒，年七十六。萬士和為撰墓誌，備志其行誼。余得讀其集本，裁取其詞，惜有闕失，容以他本補之。乙亥四月，高梧。

同日校北海藏傳鈔本。未邕。

## 231 貴希函詩餘一卷 黃岡官撫辰凝之撰

撫辰，字凝之，黃岡人。萬曆選貢，官至徐州知府。著《貴希函雲鴻洞稿》，

余於廠肆見崇禎刊本，因爲最錄其詞。案黃岡官應震爲戶科給事中，旋擢太常少卿，萬曆間與劉廷元、亓詩教齊名，聲勢煊赫，時人目爲齊、楚、浙三黨，而應震爲楚黨之魁。子撫極，字進之，任平越守，以襲擒苗帥，擢太僕卿。撫辰蓋其舅季行也。乙亥灌佛日，珍重閣書。

同日校北海書藏本。未邕。

### 232 靜觀堂詞一卷 崑山顧潛孔昭撰

顧潛，字孔昭，崑山人。十九薦賢書，登弘治丙辰進士，選庶吉士，改御史。上疏論列馬政五事，上勅所司從其議。壬戌在告，輯唐虞以來事可爲法者，名《稽古治要》，上嘉論留覽。甲子，以畿輔災變，疏論時政八事，上加采納。又劾罷光祿少卿祝祥以附外戚，進太常卿崔志端以道流。累官禮部尚書，提督京畿學政。吏部劉宇，逆瑾黨也，子官縣令，謁，潛不爲禮。銜構於瑾。出爲馬湖知府，未任旋罷。潛生平以禮自持，嘗著《慎獨箴》以志警。家居事親，又十二年，於舍南鑿池疊山，爲展桂堂居之。所著有《靜觀堂稿》、《讀史新知》、《林下記聞》、《湖堦醉韻》、《惇史夢林》等集，此自集本卷六裁出者也。乙亥孟夏，叔雍校讀記。

丁丑季春十一日，校北海傳鈔本。珍重閣。

### 233 寶綸堂佚詞一卷 暨陽陳洪綬章侯撰

《寶綸堂集》舊有康熙刊本，載詞二十九首。迨光緒間，會稽董金鑑有重槧活字不分卷本，載詞三十三首，前有孟氏撰章侯傳。按毛西河撰傳，謂崇禎末愍皇帝命供奉，不就。朱竹垞撰傳，則謂崇禎壬午入資爲國子監生。其說兩岐。而余前所據刊之康熙刊本施愚山所爲傳，則又稱崇禎召爲中書舍人者也。前刻甫成，龍榆生社兄以陳彥疇君來函見眎，且謂其家舊藏老蓮手寫詞稿十九首，內九首爲拙刻所未備，因迻寫，屬爲補行。同聲之雅，惠我者過於百朋，亟別梓鏤，麗於舊刻之後。他日苟得光緒本合補覆之，以完盛業，寧非快事！姑以俟之。文字顯晦，本有夙緣，無俟強求者也。乙亥新歲四日，珍重閣鐙窗題記。

同日校陳君迻鈔本。高梧。

### 234 恬致堂詩餘一卷 嘉興李日華君實撰

日華，字君實，號竹嬾，又號九疑。萬曆間進士，官至太僕少卿。爲人恬澹和

易，與物無忤。工書畫，精鑑賞，兼事考據家言。維時稱博雅君子者，王惟儉與董其昌相並，而日華亞之。著《恬致堂集》、《官制備考》、《姓氏譜纂》、《櫛李叢談》、《書畫想像錄》、《竹癩畫媵》、《紫桃軒雜綴》、《六研齋筆記》諸書。《筆記》、《雜綴》爲世傳誦，而《恬致堂集》頗不多見，此則自集中第十卷別錄以行者也。乙亥孟夏，叔雍校訖並記。

同日校北海藏集傳鈔本。未邕。

### 235 翰寥館詩餘一卷 華亭范允臨長倩撰

允臨，字長倩。萬曆進士，仕至福建參議。工書畫，與思白翁齊名。歸而築室姑蘇天平山之陽，故人及四方知好之來吳者，恆與遨遊山水間。詩詞恬澹冲雅，著《翰寥館集》，詞在卷一，因次錄之。允臨婦徐小淑亦工韻令，有聲於時，有《東海集》、《絡緯吟》傳世，已授梓同行矣。乙亥四月，珍重閣記。

### 236 麗崎軒詩餘一卷 休寧查應光賓王撰

查應光，字賓王，任城人。生而警敏，氣局魁然。登賢書，尋邁二親喪，以禮聞。爰創宗祠，輯家乘，羣從五世同居，庭闈雍肅。平居躋絕公門。至地方大利害，讜言不諱。同年王廣文爲仇構于御史臺，力雪其誣。里閭有質成者，折以片言，事竟，人莫敢以私餽干也。別構池草閣，日手一編。崇禎丙子，劉直指令譽以名薦，奉旨紀錄優擢。有司勸駕，辭不赴。踰年，直指張復繕疏薦用，適以微疾卒。所著有《回〔四〕書》、《易經陶瓶集》、《麗崎軒詩文集》，輯有《羣書纂》、《斲史》、《侵象錄》、《古文逸選》諸書。此則自詩文集第四卷裁錄者也。乙亥仲夏，高梧軒書。

同日據北海藏本傳鈔本校。未邕。

### 237 仁宗皇帝御製詞一卷 朱高熾撰

明仁宗昭皇帝，諱高熾，成祖長子。初封於燕，守北平。永樂二年立爲皇太子，輒受命監國。危疑之際，克盡子職。二十二年，嗣皇帝位，改元洪熙。多行仁政，赦建文諸臣，罷西洋寶船，省苛刑，納直諫，錫蹇義、楊士奇諸臣繩愆糾繆銀章。惜享國不永，德化涵濡，未之盡布也。有《御製詩集》傳世，其第六卷凡詞八首，錄之以軒冕朱明一代文治之盛云。乙亥四月，趙尊嶽跋。

據北海藏本傳鈔本校。未邕。

### 238 夢庵詞一卷 錢塘張肯繼孟撰

《夢庵詞》一卷，明浚儀張肯撰，明梅禹金藏舊鈔本。又有何夢華鈔本、趙輯寧鈔本，似皆從舊鈔本傳鈔得之，以三本脫略從同也。朱竹垞輯《詞綜》，錄夢庵〈齊天樂〉「題燕文貴楚江秋曉卷」一首，蓋從「楚江秋曉圖」真蹟錄入。余初未見《夢庵詞》，亦不知夢庵即張肯之別號。後考《錢塘縣志》文苑門，載宋人張雯事，略云：「張雯字子昭，其先浚儀人，南渡居錢塘。力學嗜書，所居臨市衢，尤精律呂，每衆坐聞樂，輒俯首翬蹙曰：『吾其不免乎！』」子田，字耘己，亦工文詞。田子肯，字繼孟，從金華宋濂學，所爲詩文清麗有法，尤長南詞新聲。」據此庶可知其行誼矣。惟《大觀錄》載文徵明畫跋云：「張肯字季孟，號夢庵，吳人。」是肯晚年嘗流寓於吳也。又《清河書畫舫》載夢庵〈齊天樂〉詞尙有跋，云：「余嘗放舟武昌，泛赤壁磯，登黃鶴樓，上巫峽，涉瞿唐之險。于楚江晨夕，飽覽奇勝。回首又二十餘年矣。今披此圖，恍然夢寐，追想舊游，姑譜〈齊天樂〉以寓所慨云。歲癸酉十月望日，夢庵識。」此跋記題詞緣起甚明，而竹垞刪之，遂難窺其崖略。案癸酉爲洪武二十六年，是肯當屬明人。竹垞以夢庵爲元人，亦未當也。余輯元詞，初收肯之《夢庵詞》及王行之《半軒詞》，《半軒》亦《詞綜》謂爲元詞者也。嗣考之皆當屬明人，因舉以眎叔雍社兄。叔雍方彙刻明詞，逾二百家，珍本祕籍，重見人間。尋三百年前詞人之墜緒，集朱明一代文苑之大觀，此雖蹄涔，當足爲滄海一勺之助也。甲戌四月望日，江寧唐圭璋識。

同日據傳鈔本校。

### 239 陶庵詩餘一卷 劍州張岱陶庵撰

陶庵，明季人，一號蝶庵居士，籍劍州，愛西湖山水，僑寓錢唐。國變之際，僅以文酒自娛。著《西湖夢尋》及《陶庵集》。詞雖未合法度，而清才逸思，時露故國之思。萬載龍榆生社兄以集本見眎，特爲裁篇授梓，用以殿明季諸家云。乙亥初夏，叔雍校記。

丁丑三月十六日，據榆生寫本校。珍重閣。

## 240 靈山藏詩餘一卷 上饒鄭以偉子籥撰

以偉，登萬曆辛丑進士，改庶吉士，授翰林院檢討，歷贊善、諭德、庶子、少詹府，右遷禮部侍郎，以忤姦璫告歸。崇禎初，起禮部尚書，兼東閣大學士，入贊機務。卒贈太子太保，予諡文恪。著《靈山藏集》，詩餘附。諍臣風骨，禁苑詞林，所作自可珍祕也。丙子孟夏，高梧校記。

## 241 觀復庵詩餘一卷 武進吳奕世子撰

吳奕，字世子，萬曆庚戌進士，出令龍谿。泲水氾濫，城不沒者三版，奕力救無恙。水退，築城修橋，不取費於民間，行法必信，胥吏不敢作姦。終以強項忤巨室，遂媒孽之，投劾以歸。著《觀復庵集》八卷、《續集》十二卷，傳播未廣。歲甲子，移宮事定，始得就大內所藏明刻本裁錄其詞。景行鄉賢，緬懷先哲，亟授之剗氏焉。丙子孟秋，邑後學趙尊嶽敬書。

## 242 袁禮部詞一卷 吳袁袞補之撰

補之，自號谷虛子，嘉靖十七年戊戌進士，官至禮部儀制司主事。補之長於文學，與諸昆季同著盛譽，東南勝侶，多嚮往之。詞二首附載集中，為裁存之。珍重閣。

## 243 濯纓餘響詞一卷 山陰朱東陽清谿撰

朱清谿以布衣終老，事蹟無可考見。子南雍，則登隆慶戊辰進士，官至太僕寺卿。斐雲宗兄得見明萬曆刊本《濯纓餘響》，附詞十三首，知為拙藏所未備，因以寫示，彌可感已。丙子天中節，珍重閣記。

## 244 保閒堂詞一卷 常熟趙士春景之撰

士春，為趙文毅公用賢孫。崇禎十年，以第三人及第，授翰林院編修。以援黃道周下獄，抗疏上陳，謫廣東布政使照磨。行誼具見《明史》。著《保閒堂集》二十六卷，各立卷目。詞亦分見諸卷中，茲合輯存之。丙子七月，高梧軒。

## 245 南宮詩餘一卷 常熟楊儀夢羽撰

儀，字夢羽，自號五川居士。登嘉靖五年進士，官至山東按察副使，構萬卷樓爲退食讀書之所，多藏宋元精槧。著有《螭頭密語》、《驪珠隨錄》、《高坡異纂》、《古虞文錄》及《南宮集》七卷。其第七卷爲詞，亦間入散曲，茲付迆刊，未爲汰乙也。丙子七月，珍重閣書。

## 246 渚山樓詞一卷 海寧潘廷章美含撰

廷章，字美含，號梅巖，明季諸生。工詩文，中年不復應試，留心經學，多所撰述。家居硤石，嘗輯《硤川志》。與仁和陸圻、同邑陸嘉淑友善，多有酬唱。門人王廷獻編其詩文，爲《渚山樓集》，嘉淑昆季序而行之。書甚罕觀，海寧陳君乃乾近刻其鄉先賢遺詞三家，始盛傳於世焉。丙子八月朔日，高梧軒書。

## 247 碧山詩餘一卷 鄆王九思敬夫撰

山東鄆人聞太史王溪陂先生之名舊矣，及壯遊京師，獲觀其文集及諸樂府，始竦然大駭曰：「是何富且奇也！」既而叨尹鄆邑，辱侍几杖。一日杯酒從容，談及詩餘。先生笑顧其孫曰：「山木，吾春雨亭有一束書，取來。」拜領以歸，詳覽精思者累日，見其篇少趣多，衆體咸備。或慷慨激烈，或舒徐和平，或醞藉含蓄，或清淑簡易，要皆華敏高妙，與李太白、溫飛卿爲千年友，蘇黃而下不論也。始復竦然大駭曰：「是何雅且麗也！」夫美而愛，愛而傳，公也，遂鋳諸梨，與好藝文者共之。先生名九思，字敬夫，號溪陂，一號碧山。今八十四歲，尚健且日事詠歌，無異少年云。嘉靖辛亥春正月戊午，日城後學宋廷琦書。

溪陂，弘治進士，授檢討。以附劉瑾，官至吏部郎中。瑾敗，降壽州同知，勒致仕。平生閒美風流，不拘禮數，善歌彈，工詞曲，與康海、何景明等游，號「十才子」。年八十餘卒。著《溪陂集》、《碧山樂府》、《碧山詩餘》、《游春記》、《中山狼傳奇》，咸盛行於時。丙子孟秋，余自上虞羅氏蟬隱廬得見嘉靖原刻本，因飭寫官過錄存之。高梧軒。

## 248 蘇愚山洞詞一卷 蒲城李應策成可撰

應策，字成可，號蒼門。萬曆癸未進士，任邱知縣。以兩居憂，歷成都、安

陽，舉卓異，授給事刑科。以倭事參處石星、沈惟敬等大辟，朝論譴之。歷太常少卿、左通政歸。居家孤高絕物，踽踽獨行，年八十卒。著有《諫垣題稿》八卷、《蘇愚山洞正續集》三十卷、《鬢宮補漏》二卷、《六緯質難》七卷、《摹真藻》四卷、《婚喪泊隄》一卷、《李氏世遺錄》三卷，裁邑志四卷。詞與南北曲羸廁，分見《正續集》，茲則別為類輯以從者也。丙子孟秋日，高梧。

#### 249 默齋詩餘一卷 靈寶許論廷議撰

廷議，靈寶人。嘉靖丙戌進士，由尚書郎進南京光祿寺少卿。尋遷南京大理寺丞，進都察院右僉都御史撫薊州，又進右副都御史。逾年，受命撫山西，以功進兵部尚書。萬曆初，予諡恭襄。行誼具詳汪道昆所撰傳中。著《默齋集》，詩餘十首附。丙子暑中，邊患告亟，余北行客京師，得見集本，為輯存之。珍春閣。

#### 250 安甫詩餘一卷 吳陳堯德安甫撰

詩餘十三首，蓋自舊鈔本《陳安甫小草》所裁錄。陳嘗自稱「賣菜傭」，於其自序有曰：「堯德廢舉子業，販衣賣繒，兌錢糴穀，衫帽蒙塵，筋骨煩擾。弱孩早喪，少婦夜摧，青蚨散盡，黑蝨在頭，餬口無策，每晨荷菜入城，易錢數片。」則其堅貞之情可以概見，而集中又多冶游之作，則安甫何前侈而後儉耶，亦傷心人別有懷抱耶？此〔外〕行誼無可徵。考詩集卜彜年為之評點，則彜年與同里閔，固相友善。彜年於國變後佯狂以終，則安甫亦必篤首陽之節，因而窮餓海濱，可以知己。丙子雙蓮節，珍重閣。

#### 251 西遊詩餘一卷 江陵蘇惟霖雲浦撰

惟霖，萬曆戊戌進士，官監察御史巡視兩淮漕儲，按山西，調河南按察副使。性稟穎異，事親以孝聞。諸昆弟碌碌，僅守先業，惟霖仕達，所得祿賜，盡以均給之。歸田後，優游小龍湖，與公安袁宏道、康山李維楨、同里吳道昌諸人相和酬唱，年五十卒。著《西游集》，詞附，雖不能工，而林泉瀟灑，亦復清逸可喜也。丙子暑中北游，得於王城，見而逐寫，因並考其仕履。珍重閣記。

#### 252 心遠樓詞一卷 休寧楊琢季成撰

季成，元時隱居不仕，自號放鶴翁。與趙東山、朱楓林為友，而私淑於陳定

宇。洪武初，以儒行任本縣儒學教諭。弘治中，其裔孫鳳梓其遺書，題《心遠樓存稿》，凡八卷。其書久佚不傳。《明史藝文志》及《千頃堂書目》均未著錄。余得見漢陽葉氏所藏舊鈔本，彌可珍祕，因傳錄其詞，以示叔雍焉。丙子秋日，萬里附記。

### 253 詠懷堂詞一卷 懷寧阮大鍼圓海撰

圓海事蹟，備詳載籍，無俟贅陳。獨所著《詠懷堂詩》清微澹遠，歸於陶、謝一流，初與其人之微利逐名，終以身殉者迥異。氣質行誼，相去甚遠，古來神姦巨慝，乃往往有之也。詞四首，分見詩集及《今詞初集》。江陵唐圭璋社兄輯寫見寄，因付墨板，庶與《春鐙》、《燕子》共傳於世云。丙子白露日，珍重閣。

### 254 東武山人詞一卷 山陰朱公節允中撰

公節，舉嘉靖辛卯鄉試，謁（送）〔選〕知彭澤縣，擢泰州知州，罷歸。以次子太師文愨公賡貴，累贈如其官。溯為諸生時，博聞強識，即務古學，與陳山人鶴、沈經歷鍊結社為詩歌。錢謙益評其詩，謂為學殖深厚，骨氣清真，具見推挹之忱。著《東武山人集》，蓋乾隆辛巳間八世孫繼相為之板行者也。詞四首，附載卷七，為裁梓之。丙子七月既望，高梧軒記。

### 255 北潭詞一卷 清苑傅珪邦瑞撰

珪，字邦（直）〔瑞〕，成化二十二年進士，官至禮部尚書。卒贈太子少保，諡文毅。事誼具見史傳。著《北潭集》，附詞一首。丙子孟夏，黃公渚社兄就劉氏嘉業堂藏集本錄示，亦足以張吾軍也。高梧軒記。

### 256 西園詩餘一卷 博羅張萱孟奇撰

孟奇，一字九岳，別號西園。萬曆中舉於鄉，官至平越知府。好學博識，經史百氏，靡不淹通。能畫，書法兼通諸體。著《彙雅》、《西園集》，詩餘附。斐雲宗兄於京師見明刊集本，錄詞見眎，即以授梓焉。丙子新秋，高梧軒識。

### 257 漸江詞一卷 海寧查容韜荒撰

韜荒，號漸江。明季人。工詩文，天才卓絕，性秉簡傲，輒從外兄朱竹垞游。

肆力史事，長於持論，古今成敗得失，歷歷在心。少應童子試，以場中例有搜檢挾帶，以爲慢士，拂衣徑出，遂以布衣終老。家貧，不問生產，出游四方，筆耕自給。年五十，客死楚中。蓋逸民之流亞也。丙子仲秋，珍重閣校記。

### 258 坐隱先生詩餘一卷 休寧汪廷訥昌朝撰

廷訥，字昌朝，一字無如。萬曆間官鹽運使。著《環翠堂集》、《廣陵月》雜劇、《天書記》、《三祝記》諸傳奇，又《坐隱棊譜》、《人鏡陽秋》，蓋亦能文好博之士也。集本凡三十卷，別爲《坐隱集選》四卷，《四庫存目》著錄之。按蕭和中序，「坐隱」乃其園名，故別自摘選爲四卷本，凡詩詞、南北曲各一卷，隨錄一卷，詞如干首，無不緯以奕事，足見癖嗜之深，亦蘭苑之別裁矣。丙子八月，珍重閣校記。

### 259 小雅堂詞一卷 雲間莫雲卿廷韓撰

是龍，如忠子，字雲卿，後以字行，更字廷韓，號秋水，又號後朋。嘉靖間人。能文，善書畫，皇甫汸、王世貞輩亟稱之。以貢生終。著《石秀齋集》及《畫說》，寸縑尺帛，傳之至今，價直兼金。曩歲余得其子秉清《采隱詩餘》，付之劖氏，獨惜莫氏何以不合《小雅堂集》同刊。茲者北游，斐雲宗兄乃以明刊集本過錄見示，合之爲一家之言，喜不自勝，秉燭爲跋。時丙子之秋七月既望，珍重閣識。

### 260 膠東詞一卷 華亭周思兼叔夜撰

思兼，字叔夜，號萊峰。工書畫。嘉靖進士，除平度知州，治行舉第一，累官湖廣僉事。岷府宗室五人，封爵皆將軍，殺人掠貨，監司避不入武岡者二十年。思兼繫其黨於獄，五人懷利刃入，思兼婉諭之，皆沮退。乃列其罪上聞，悉錮之。後以憂去官，遂不復出。迨卒，門弟子私謚「貞靖先生」。著《叔夜集》、《學道紀言》。此則就集本第四卷裁篇以行者也。丙子秋夜，高梧讀記。

### 261 名媛詩緯初編詩餘集二卷 山陰王端淑玉映選輯

《詩餘集》上下二卷，爲《名媛詩緯》之第三十五、六卷。輯者王端淑，山陰王季重先生女也。季重殉國難，大節凜然。金閨才彥，乃輯一代之翰墨，付之棗梨。滄桑之際，賴爲傳作，信可寶矣。其書流播絕罕。甲戌之秋，余在海上書肆見之，未及收購，已歸雲間施氏無相庵。明歲，始得獲錄副本，舉示叔雍社兄。叔雍

方彙刊明詞，以爲可補選集之未備，因以貽之。至《詩緯》三十七、八兩卷，題曰「雅集」者，則爲散曲，他日當別梓以廣吾曲圍焉。丙子孟冬，廬前冀野甫識於飲虹簃。

### 262 涇林詞一卷 崑山周復俊子籟撰

公字子籟，號木涇，崑山人。舉嘉靖壬辰會魁，仕至雲南左布政使，晉南太僕寺卿，致仕。公少與王同祖、顧夢圭齊名，稱「崑山三儁」。入滇，與楊升庵極相得。著有《六梅館集》八卷，內《涇林詩集》三卷、《涇林文集》五卷。詞不多作，僅此三篇附刻詩後。集本流播未廣，竊懼湮沒，因寫寄叔雍道兄輯刊之。丙子仲秋，族孫周慤雁石甫謹識。

### 263 珠塵詞一卷 嘉善潘炳孚大文撰

炳孚，字大文。父永澄，興化太守。家多藏書，窮三年之力遍讀之，雄於文。崇禎三年，黃石齋典試得其卷，擬擢第一，以後場格於功令見遺。爲人矜奇傲舉，名行自砥。房師阮公行縣至邑，欲邀一見，敦迫乃往。阮迎謂曰：「子天下才，名當在李夢陽上。」炳孚瞠目曰：「李夢陽爲誰？」示不屑也。後以科試卷過放部議，奪其餼。炳孚曰：「吾能改面目與俗人伍耶？」遂廢於酒，卒年未三十。有《珠塵遺稿》一卷，同里錢繼章爲輯入《人琴錄》中。丙子十一月，珍重閣書。

### 264 清喚齋詞一卷 嘉善劉芳墨仙撰

墨仙，崇禎間人。少孤，撫于祖。年三十，青其衿，旋食餼，一時名士皆樂與之游。既而游金陵，疽發于背以死。有《清喚齋遺稿》一卷，同里錢繼章彙梓朋好之作爲《人琴錄》，因輯存之。丙子仲冬，珍重閣得斐雲宗兄傳鈔本校記。

### 265 樓谿樂府一卷 平度崔廷槐公桃撰

廷槐，字公桃，平度州人。嘉靖丙辰進士，授戶部主事，歷郎中，出爲四川僉事，卒。著《樓谿集》三十六卷，此則從明刻集本卷十六、十七裁篇別錄，合之爲一卷者也。丙子仲冬，珍重閣。

266 乙巳春游詩餘一卷 祥符李濂川父撰

濂，正德甲戌進士，授沔陽知州，遷寧波同知，擢山西按察僉事。著有《嵩渚集》一百集、《乙巳春游稿》五卷、《祥符文獻志》十七卷、《祥符鄉賢傳》八卷。丙子仲春，斐雲宗兄自京師寫示，爲付墨板。叔雍記。

267 豁堂老人詩餘一卷 仁和釋正岳豁堂撰

正岳，字豁堂，仁和郭氏子，出家靈隱。法藏說法淨慈，作頌往呈，遂承印證。壬辰，主三峰席。歷主靈隱、淨慈，退居普寧。示寂，預刻時日，至期作辭世偈，擲筆而逝。或云，豁堂徐姓，名繼恩，武林名士，國變後爲僧。嘗云：「人非金石，立見消亡，不若逃形全真，自遊方外。」著《同凡草》。王新城目爲湯惠休、帛道猷之流。亦工書，能畫山水，筆意蒼秀。此則自《同凡草》卷九逐錄者也。丙子仲冬，高梧校餘並識。

268 徧行堂詞集一卷 丹霞今釋澹歸撰